

德化縣志

德化縣志卷第十六

知德化縣事

高錫三補輯

鄒文炳再輯
陳鼐續輯

倉儲

縣常平倉在治前後左右列天地人日月星辰宇宙九號

一儀門內東天字廩瓦屋五間大堂左地字廩瓦屋三

間大堂右人字廩瓦屋三間頭門內東日字廩瓦屋五

間康熙五十八年知縣張近光建

一頭門內西月字廩瓦屋三間 國初知縣張應午建

一捕廳門東星字廩瓦屋五間雍正十年知縣張思恬

德化縣志

卷十六食貨

倉儲

一

添建

一馬號口辰字廩瓦屋八間馬號裏側宇字廩瓦屋八

間雍正十一十二年知縣張思恬添建

一治後宙字廩瓦屋十一間乾隆三年知縣景師毅添

建四十四年知縣沈錫三重修以上倉廩兵燬今移建

縣文廟右

關義倉九江關採買積貯之項雍正八年知府蔡學灝建

在巡道舊址今廢其倉穀分貯縣倉乾隆八年將倉基

改建考棚

國朝巡道劉均建設倉儲記古無常豐之歲也而其民不
至於重困則所以籌之者詳且盡耳有籌之於當事者
有籌之於事先者籌之於當事僅可以全活吾民籌之
於事先則所以安飽吾民也

國家於所在州邑設立倉廩儲穀其中謹其蓋藏時其燥
溼責專於守令而督察以大僚自畿內以及遠方所積
無不滿山溢海遇歉歲則平價糶之歉甚則計口調之
游賈不能操其贏貧人得以溥其惠蓋按常平義倉之
遺法而折其衷其籌之於事先者亦既詳且悉矣顧民

之飢飽繫於穀穀之出納主於官由州邑以達之郡由
郡以達之司與院而後乃入告焉文移上下越月踰時
其間之相因相濟而使民無目前之憂者不可不急爲
籌也予攝篆潯關額稅而外纍積錙銖號曰平餘歲約
數千兩例上之巡撫中丞貯司庫以資公用每念公用
之大者孰有過於濟民倘以此銀市穀儲之可得數千
石歲稔則以告於巡撫中丞或糶或賑朝請而夕行民
之取食於倉也猶其取食於家也且江州水陸之衝舸
載擔超人力所湊則鄰壤亦深有賴焉夫積穀如積水

然通川大河相隔數里不遽相及也溝澮陂池在數武之內則桔槔可以挹注之矣州邑之倉通川也瀦遠而漑遲潯關之倉陂池也地親而漑速兩相因而兩相濟則歲不病而民不傷先後之籌庶幾無不備矣乎而巡撫中丞適獲我心以潯贛兩關竝請於

朝輒得

諭旨予遂擇地於江州使署舊址建倉二十間堅緻爽塏不憂卑溼中爲官廳三間左右翼以四小室前爲大門亦以四小室翼之使守倉者居焉土木傭力之值計白金

德化縣志

卷十六食貨

倉儲

三

六百六十兩有奇皆撫軍裁汰諸項所節省者士民欣喜相告謂使君大有造於我儕也予曰是

聖天子浩蕩之恩巡撫中丞尺疏之庇予其敢任德抑予於是竊有感矣憶丁未春夏間德化瀕江之民苦於霖潦往往乏食而疫厲時亦間作予悉出餘俸倡同志釀貲市米於饒州往還若踐更然諸丞尉單騎四出設粥給米并肘藥物以行老幼啼呼余每見爲之涕下令早得是穀而儲之豈復皇皇爲當事支吾之計哉謹立石廳左用紀盛事是役也工始於戊申七月三日落成則九

月十有五日也

南糧倉舊在城東北萬曆二十年知縣楊維岱建後裁抵本郡兵餉移入縣

預備倉在縣治半里許廢

儒學倉在戟門之西宏治三年知府童潮重建廢

舊志東南西北四鄉有倉俱廢

府常平倉共十一間在府署儀門內乾隆三十年奉文積穀歸縣經理

縣常平倉貯穀貳萬石

德化縣志

卷十六食貨

倉儲

四

九江關義倉穀貳千壹百玖拾陸石貳斗伍升乾隆五年買補因關義倉傾圮分貯穀貳千貳百陸拾玖石肆斗伍升乾隆六年桑落洲地方被水賑濟知縣景師毅動用穀柒拾叁石貳斗現存前數附貯常平倉內

府常平倉積穀陸千石乾隆三十年奉文歸縣經理

社倉
附

德化鄉

東
西

兩倉共貯穀捌百叁拾石叁斗伍升叁合

仁二鄉倉共貯穀陸百陸拾陸石柒斗貳升捌合

仙二鄉倉共貯穀捌百叁拾石叁斗伍升柒合

甘二鄉倉貯穀玖百叁拾叁石肆斗伍升捌合

南昌鄉倉貯穀肆百壹拾伍石壹斗柒升柒合

白鶴鄉倉貯穀肆百叁拾叁石貳斗肆升玖合

封二鄉倉貯穀肆百叁拾叁石貳斗肆升玖合

桑落鄉倉貯穀貳百壹拾陸石捌斗伍升玖合崩塌入江

報銷在案

以上八鄉共貯穀肆千柒百伍拾玖石肆斗叁升係乾隆十八年奏銷冊報之數定例春借秋還隨交加壹息穀叁升作耗柒升歸倉額數歲增自十九年至四十四

年歲增本息穀共壹萬陸百肆拾陸石肆斗伍升壹合叁勺是年奉文將乾隆四年起至四拾叁年止所收息穀柒千叁百壹拾肆石叁斗貳升玖合捌勺於來年青黃不接時按照時價出糶解司報部留作地方農田水利必須工作勢不可緩者奏明動用嗣後借放所收息穀積至伍萬石以上再行酌看情形奏明核辦

